

ಪೌಲನು ಪಿಲಿಪಿಯದವರಿಗೆ ಬರೆದ ಪತ್ರಿಕೆ ಪೌಲಾನಿ ಪಿಲಿಪ್ಪಾತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ವಳಕ್

ಪಿಲಿಪ್ಪಿತ್‌ಲ್ಯಾನಾ ಲಿವ್‌ಲ್ಯಾಲ್ಯಾ ಪತ್ರಲ್ಯಾಚಿ ವಳಕ್ ಪೌಲಾನಿ ಕ್ರಿಸ್ತ ಜಲಾಮಲ್ಯಾ ನಂತರ್ ಲ ಕರುನ್ 61 ವರ್ಸಾತ್ ಹ್ಯ ಪತ್ರ ಪಿಲಿಪ್ಪಿ ನಗರಾತ್‌ಲ್ಯಾ ಇಸ್ತಾಸಿನಾ ಲಿವ್‌ಲ್ಯಾ ಹ್ಯಾ ಯಳಾತ್ ತ್ಯೊ ಲ ಕರುನ್ ರೊಮಾಚಾ ತುರುಂಗಾತ್ ಹುತ್ತಾ 1:13 ಹ್ಯ ಪತ್ರ ಪಿಲಿಪ್ಪಿ ಪೆರತ್ ಆಸ್‌ಲ್ಯಾಲೆ ಸಬೆಲಾ ಲಿವ್‌ಲ್ಯಾ ಅಪೊಸ್ತಲಾಚಾ ಪುಸ್ತಕಾತ್ ಪಿಲಿಪ್ಪಿಚೆ ಗುಶ್ಟಿತ್ ಆಮಿ ಥೊಡ್ಯಾ ಗುಶ್ಟಿ ಸಿಕ್ವಾವ ಪಿಲಿಪ್ಪಿ ಪ್ಯಾಟ್ ಮೆಕೆದೊನ್ಯಾ ಪ್ರಾಂತ್ಯಾಚಿ ರಾಜ್‌ಧಾನಿ ಜಾಲ್ಲಿ. ಹಿ ಸಭಾ ಮೆಕೆದೊನ್ಯಾತ್ ಬ್ಯಾಂದ್‌ಲ್ಯಾಲಿ ಪೈಲಿ ಸಭೆ ಜಾಲ್ಲಿ. ಪೌಲಾನಿ ಆನಿ ಸಿಲಾನಿ ಹಿ ಸಭಾ ಸರ್ವಾತ್ ಕಿಲಿ ಆನಿ ತಿಥ ಆಸ್ತಾನಾ ಯಕ್ ರ್ಯಾತ್ ತುರುಂಗಾತ್ ಥೆವ್ಲ ಹುತ್ತ. ಅಪೊಸ್ತಲ್ 16

ಹ್ಯ ಪತ್ರ ಲಿವಾಯಾ ಪೌಲಾಚ್ ಖುಬ್ ಉದ್ದೆಸ್ ಆಸ್ಲಿಲ. ತ್ಯನಿ ಹ್ಯೊ ಅವ್ಕಾಸ್ ಆಮಿ ತುರುಂಗಾತ್ ಹಾವ್ ಮನ್ವುನ್ ಐಕುನ್ ತ್ಯಂಚಾನಿ ಲಾವುನ್ ದಿಲ್ಯಾಲ್ಯಾ ಬಹುಮಾನಾಸಾಟಿ ಸಬೆಲಾ ದನ್ಯವಾದ್ ಸಾಂಗಾಯಾ ವಾಫರ್ತೊ 4:10-19 ತ್ಯೊ ತುರುಂಗಾತ್ ಆಸ್‌ಲ್ಯಾಲೆ ಆಪ್ಲೆ ಪರಸ್ಥಿತಿ ಲಿವ್ತೊ ಆನಿ ತಿಮೊಥೆ ಆನಿ ಎಪಫ್ರೊದಿತಾಚಿ ಸಬೆಲಾ ವಳಕ್ ಕರ್ತೊ 2:19-30 ಆನಿ ತೀ ತ್ಯನಾ ವವ್ಯಾಳಾಯಾ ಆನಿ ತ್ಯಂಚಾ ಫುಡಾರಿ ಫನಾಲಾ ಮರ್ಯಾದ್ ದಿಯಾ ಶಾರ್ಕ್ ಕೆಲ.

ಪಿರಿಕೆ

1. ಪೌಲ್ ಪಿಲಿಪ್ಪಿ ಸಬೆಲಾ ನಮಸ್ಕಾರ್ ಕರಿತ್ ಪತ್ರ ಸುರು ಕರ್ತೊ 1:1-2
2. ಮಂಗ್ ತ್ಯೊ ಆಪ್ಲೆ ಪರಸ್ಥಿತಿಚೆ ಗುಶ್ಟಿತ್ ಥುಡಿ ಬಾತ್ಸಿ ಸಾಂಗ್ತೊ ಆನಿ ತ್ಯಲಾ ಆಸ್‌ಲ್ಯಾಲೆ ಥೊಡೆ ಕ್ಯಾಳ್ಜಿಚೆ ಗುಶ್ಟಿತ್ ಸಾಂಗ್ತೊ 1:3—2:30

3. ಮಂಗ್ ತ್ಯೊ ಕ್ರಿಸ್ತಾಚಾ ಜೀವ್ನಾ ಕರಾಯಾ ಖುಬ್ ಕಾಮಾಚಾ ವಾಟಂಚಿ ಸುಸ್ನಾ ದೆತೊ3:1—4:9
4. ಪೌಲ್ ಪಿಲಿಪ್ಪಿ ಸಬೆಲಾ ತ್ಯನಿ ಲಾವುನ್ ದಿಲ್ಯಾಲ್ಯಾ ಬೊಮಾನಾಸಾಟಿ ದನ್ಯವಾದ್ ಸಾಂಗುನ್ ಆಪ್ಲ ನಮಸ್ಕಾರ್ ಸಾಂಗಿತ್ ಪತ್ರ ಸುಪಿವ್ಣೊ4:10-23

¹ ಕ್ರಿಸ್ತ ಯೇಸುಚ್ ದಾಸ್ ಜಾಲ್ಯಾಲ ಪೌಲ್ ಆನಿ ತಿಮೊಥೆ, ಪಿಲಿಪ್ಪಿತ್ ಕ್ರಿಸ್ತ ಯೇಸುಸ್ಲಾಗುನ್ ದೇವಾಚಿ ಲೊಕ ಜಾಲ್ಯಾಲ್ಯಾ ಸಗ್ಳಾಳಾ ಆನಿ ತ್ಯಂಚಿ ಸಂಗ ಆಸ್ಲಾಲ್ಯಾ ಸಭೆಚಾ ಫುಡಾರಿ ಸಭೆಚಾ ಮಜ್ಜತ್ ಕರ್ನಾರ್ನಾನಾ ಲಿವಾಚ್ ಕ್ಯಾಮಂಜೆ,

² ಆಮ್ಚಾ ಬಾ ಜಾಲ್ಯಾಲ್ಯಾ ದೇವಾಪ್ಪಿಬಿ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಪ್ಪಿ ತುಮಾನಾ ಕ್ರಪಾ, ಶಾಂತಿ ಗಾವುನಿ.

ವಾಚಿವ್ತ್ಯಾಲ್ಯಾಂಚಿಸಾಟಿ ಪೌಲಾಚ್ ಮಾಗ್ನ್

³ ಮಿ ತುಮ್ಚಿ ಯಾದ್ ಕರ್ತಾನಾಸ್ ಮಾಜಾ ದೇವಾಲಾ ದನ್ಯವಾದ್ ಕರ್ತೊ.

⁴ ಮಿ ತುಮ್ಚಿಸಾಟಿ ದೇವಾಪ ಮಾಗ್ನ್ ಕರ್ತಾಲ್ಯಾ ಸಗ್ಳಾ ಯೆಳಾತ್ ಆನಂದಾನಿಸ್ ಮಾಗ್ನ್ ಕರ್ತಾಲಾ ಜಾಲ್ಯೊ.

⁵ ಕಾ ಮಂಜೆ ತುಮಿ ಆಂದಿಸ್ವಾವ್ಣಿ ಆಜ್ವರ್ಯಾತ್ ಬರೆ ಖಬರಿಚಾ ಸಾಂಗ್ಣಾತ್ ಮಜ್ಜತ್ಕರ್ತಾಲ ಜಾಲ್ಯಾಸಾ.

⁶ ಹ್ಯ ಚಾಂಗ್ಲ ಕಾಮ್ ತುಮ್ಚಿಪ ಸುರ್ವಾತ್ ಕೆಲ್ಯಾಲಾ ತ್ಯ ಚಾಲ್ವುನು ಯೇಸು ಕ್ರಿಸ್ತ ಯಯಾಚಾ ದಿಸಾಪರತ್ ಪುರ ಕರಾಯಾ ಆನ್ನಾರ್ ಮನ್ಶುನ್ ಮನಾ ಖಾತ್ರಿ ಹಾ.

⁷ ತುಮ್ಚೆ ಸಗ್ಳಾಂಚೆ ಗುಪ್ತಿತ್ ಮನಾ ಆಸ ವಾಟಾಚ್ ಶಾರ್ಕ್ ಹಾ. ಮಿ ತುರಂಗಾತ್ ಆಸ್ಲಾನಾ, ಬರೆ ಖಬರಿಚಾ ಪರತೇಕ್ ವಾದಾತ್ಲಿ ತುಮಿ ಸಗ್ಳಿ ಮಾಜಿ ಸಂಗ ದೇವಾಚಿ ಕ್ರಪೆತ್ ವಾಟ್ದಿದಾರ್ ಜಾಲ್ಯಾಸಾ ಮನ್ಶುನ್ ತುಮಿ ಮಾಜಾ ಮನಾತ್ ಹಾಸಾ.

⁸ ಕ್ರಿಸ್ತ ಯೇಸುಪ ಆಸ್ಲಾಲೆ ಕನಿಕಾರಾಲಾ ತುಮ್ಚೆ ಸಗ್ಳಾಂಚೆ ಸಾಟಿ ಕ್ಯವ್ಡಾ ತಳಮಳ್ಣೊ. ಹ್ಯಾಲಾ ದೇವುಸ್ ವಳಕ್.

9 ಆನಿ ತುಮ್ಮಿ ಮಾಯಾ ಆಜುನ್ ಖುಬ್ ಪುರ್ರಾ ಗಿನ್ಯಾನಾನಿ ಇಚಾರಾನಿ ವಾಡುನಿ ಮನ್ಹುನ್ ಮಿ ತುಮ್ಮಿ ಸಾಟಿ ಮಾಗ್ನ ಕರ್ತೊ.

10 ಆನಿ ಚಾಂಗ್ಲಿ ಕಾಮ ಕಚಿ ಮನ್ಹುನ್ ಸಗ್ಳಾ ಇಚಾರ್ ಕರಾಯಾ ವ್ಹಯಿ. ಮನ್ಹುನ್ ಆನಿ ಕ್ರಿಸ್ತ ಯಯಾಚಾ ದಿಸಾತ್ ತುಮಿ ನಿರ್ಮಳ್, ದೊಶ್ ನಸ್ಸಾರಿ, ರಾಹ್ಯಾ ವ್ಹಯಿಸಾ

11 ದೇವಾಚೆ ಮಹಿಮೆಸಾಟಿ ಆನಿ ಸ್ತೊತ್ರಾಸಾಟಿ ಯೇಸು ಕ್ರಿಸ್ತಾನಿ ಉತ್ಪನ್ ಕೆಲ್ಯಾಲ ಖರ್ರಾ ಜಾಲ್ಯಾಲ್ಯಾ ಚಾಂಗಲ್ಯಾ ಗುನಾನಿ ತುಮ್ಚಾ ಜೀವ್ನಾ ಬರ್ನಾರ್.

ಜಿವ್ನಾ ಕರಾಯಾ ಕ್ರಿಸ್ತ್

12 ಬನ್ವಿ ಬಾವ್ತಾನ್, ದೇವಾಚೆ ಮೈಮಾ ಆನಿ ಸ್ತೊತ್ರಾಸಾಟಿ ಯೇಸುಕ್ರಿಸ್ತ ಹ್ಯ ಸಗ್ಳೆ ಬರಿ ಖಬರ್ ಸಾಂಗಾಯಾ ಮಜತ್ ಜಾಲಿ ಮನ್ಹುನ್ ತುಮಿ ಸಮಜುನ್ ಗಿಹ್ಯಾ ವ್ಹಯಿಸಾ ಮನ್ಹುನ್ ಮನ್ ಕರ್ತೊ.

13 ಕಸ ಮಂಜೆ ಮಿ ತುರಂಗಾತ ರಾಯಲ್ಯಾಲೊ ಕ್ರಿಸ್ತಾಸ್ ಲಾಗುನುಸ್ ಮನ್ಹುನ್ ರಾಜವಾಡ್ಯಾಚಾ ರಾಖನ್ನಾರಾನಾ ಆನಿ ಬಾಕಿಚಾ ಸಗ್ಳಾನಾ ಸಮಾಜ್ ಹುತ್ತ್.

14 ಯವ್ಹಸ್ ನವ್ವ ಬನ್ವಿ ಬಾವ್ತಾತ್ಲ್ಯಾ ಖುಬ್ ಜನಾನಾ ಮನಾ ಕೊಂಡಲ್ಯಾಲ್ಯಾಸ್ ಲಾಗುನ್ ಪ್ರಭುಪ ಇಸ್ವಾಸಾನಿ ದೇವಾಚೆ ಬರಿ ಖಬರ್ ಭೆ ನಸ್ಥಾನಾ ಆನಿ ಸಾಂಗಾಯಾ ಖುಬ್ ಧೀರ್ ಆಲಾ.

15 ಥೊಡಜಾನ್ ಖೊಟ್ಯಾಫನಾನಿ ದುಯಿ ಗಾಲ್ಟಾಯಾ ವ್ಹಯಿ ಮನ್ಹುನ್ ಸಾಂಗ್ತ್ಯಾತ ಆನಿ ಥೊಡ ಚಾಂಗಲ್ಯಾ ಮನಾನಿ ಕ್ರಿಸ್ತಾಚೆ ಗುಸ್ತಿತ್ ಸಾಂಗ್ತ್ಯಾತ.

16 ಹೆ ತರಿ ಬರೆ ಖಬರಿಚೆ ಗುಶ್ಟಿತ್ ಉತ್ತರ್ ಸಾಂಗಾಯಾ ಸಾಟಿ ಮನಾ ಹಿತ್ತ ಗ್ಯಾತ್ಲ್ಯಾ ಮನ್ಹುನ್ ಸಮಜುನ್ ಮಾಯೆನಿ ಹ್ಯ ಕರ್ತ್ಯಾತ.

17 ತೇ ದುಸ್ರೆ ತರಚೆ ಆಸ್ಲ್ಯಾವ ಮಿ ಬೆಡ್ಯಾಂಚಾನಿ ಬ್ಯಾಂದ್ಲ್ಯಾಲೊ ಹತೊ ತವಾಬಿ ಮನಾ ತರಾಸ್ ಜಾಸ್ತಿ ಕರಾಯಾ ವ್ಹಯಿ ಮನ್ಹುನ್ ಯವಜುನ್, ಪ್ರಾಮಾನಿಕ್ ನಸ್ಲ್ಯಾಲ್ಯಾನಿ ಸ್ವತಾಚಾ ಉದ್ದೆಶಾನಿ ಕ್ರಿಸ್ತಾಚೆ ಗುಸ್ತಿತ್ ಸಾಂಗ್ತಾರ ಜಾಲ್ಯಾತ.

18 ಕಸ ಜಾಲತರಿ ಕ್ಯಾ? ಕಚೆ ತರನಿಬಿ ಕಪ್‌ಟ್ಯಾನಿ ನಾಹಿತ ಖರಲ್ಯಾನಿ ವ್ಹವುನಿ ಕ್ರಿಸ್ತಾಚ್ ಸಾಂಗ್‌ಲ್ಯಾಲ ಹಾ, ಹ್ಯನಿ ಮನಾ ಸಂತೊಶ್ ಜಾಲ್ಯಾ ಮೊರ್ಟ್‌ಬಿ ಸಂತೊಶ್ ವ್ಹನಾರ್.

19 ಕಾ ಮಂಜೆ ತುಮ್ಮಾ ಮಾಗ್‌ನ್ಯಾನಿ ಆನಿ ಯೇಸು ಕ್ರಿಸ್ತಾಚಾ ಆತ್‌ಮ್ಯಾಚೆ ಮಜ್ಜತಿನಿ ಹ್ಯ ಮಾಜೆ ಸುಟ್ಕುಕಿಲಾ ಪ್ಯಾಯ್ಡಾ ವ್ಹಯಿಲ್ ಮನ್ವುನ್ ಮನಾ ರಾವ ಹಾ.

20 ಕಸ ಮಂಜೆ ಮಿ ಕಸ್ಲೆ ಗುಶ್ಟಿತ್ ಲಾಜಾಚೆ ಆಂದಿ ಖಾಯಿಮ್ಜೆಗತ್ ಆತ್ಮಾಬಿ ಖುಬ್ ದಿರ್ಲ್ಯಾನಿ ಹಾ ಮನ್ವುನ್ ಜಗೊತರಿ ಶಾರ್ಕ್ ಮೆಲೊ ತರಿ ಶಾರ್ಕ್ ಮಾಜಾ ಶರೀರಾಸ್ ಲಾಗುನ್ ಕ್ರಿಸ್ತಾಲಾ ಮೈಮಾ ವ್ಹಯಾ ವ್ಹಯಿ ಮನ್ವುನ್ ಮಾಜ್ ಖುಬ್ ಮನ್ ಜಾಲ್ಲ್ಯಾ ತಸಸ್ ವ್ಹನಾರ್ ಮನ್ವುನ್ ಆಶಾ ಹಾ.

21 ಮನಾತರಿ ಜಗಾಚ್ ಮಂಜೆ ಕ್ರಿಸ್ತುಸ್, ಮರಾಫಾ ಪ್ಯಾಯ್ಡಾ.

22 ಶರೀರಾತ್ ಜೀವ್ಪಾ ಕರಾಯಾ ಸಾಟಿ ಮಾಜ್ ಕಾಮ್ ಕರುನ್ ಪ್ಯಾಯ್ಡಾ ಗಿಹ್ಯಾ ಮನಾ ವ್ಹನಾರ್ ಆಸ ಆಸ್ಥಾನಾ ಕಚ್ ನಿವ್ಡುನ್ ಗಿಹ್ಯಾ ವ್ಹಯಿ ಮನ್ವುನ್ ಮನಾ ಸಮಜನಾ.

23 ಹೇ ದುನಿಚೆ ಮದ್ದಿಗಾವುನ್ ಪಡ್ಲೊ ಹೀತ್ವಿ ನಿಗುನ್ ಕ್ರಿಸ್ತಾಚೆ ಸಂಗ ರಾಹ್ಯಾಚೆಸ್ ಮಾಜ್ ಮನ್, ತ್ಯಾ ಖುಬ್ ಬರಜಾಲ್ಯಾ.

24 ಫನ್ ಮೀ ಆಜುನ್ ಶರೀರಾನಿ ಜಿತ್ತಾ ಹಾ ಮನ್ವುನ್ ತುಮ್ಮಿ ಸಾಟಿ ಖುಬ್ ಗರಜ್ ಹಾ.

25 ಮನ್ವುನ್ ತುಮಾನಾ ಕ್ರಿಸ್ತಾಚಾ ಇಸ್ವಾಸಾತ್ ವಾಡತ್ ಸಂತೊಸ್ ವ್ಹಯಾ ಸಾಟಿ ಮೀ ಜಿತ್ತಾ ರಾಹುನ್ ತುಮ್ಮಿ ಸಂಗ ರಾನ್ಹಾರ್ ಮನ್ವುನ್ ಘಟ್ ಇಸ್ವಾಸ್ ಹಾ.

26 ಆಸಾ ಮೀ ಪರ್ತುನ್ ತುಮ್ಮಿಪ ಯತ್ಯೊ ಮನ್ವುನ್ ತುಮಿ ಕ್ರಿಸ್ತ ಯೇಸುಚೆ ಗುಸ್ತಿತ್ ಸಂತೊಸ್ ವ್ಹಯಾ ಸಾಟಿ ಮಾಜಿಪ್ಪಿ ಖುಬ್ ಕಾರನ್ ವ್ಹನಾರ್.

ಇಸ್ವಾಸಿಂಚಾನಿ ಬರೆ ಖಬರಿಲಾ ಯೊಗ್ಯ ರಾಹ್ಯಾ ವ್ಹಯಿ ಮನ್ವುನ್ ಶಿಕ್ಷೆನ್

27 ಕಸಬಿ ಕ್ರಿಸ್ತಾಚೆ ಬರೆ ಖಬರಿಲಾ ಚಾಂಗ್ಲೆ ವ್ಹಪುನ್ ಚಾಲಾ. ತವಾ ಮಿ ಯವುನ್ ತುಮಾನಾ ಬಗ್ಲೆ ತರಿ, ದುರ್ ರಾಹುನ್ ತುಮ್ಚೆ ಗುಶ್ಟಿತ್ ಐಕ್ಲತರಿ ತ್ಯವ್ಡಸ್. ತುಮಿ ತುಮ್ಚಾ ವಾದಿನಾ ಕಚೆಸ್ ಗುಸ್ತಿತ್ ಬಿಹ್ಯಾಚೆ ಆಂದಿ ಯಕಾ ಮನಾನಿ ಘಟ್ ಉಬ ರಾಹುನ್ ಬರೆ ಖಬರಿವ ಥೆವ್‌ಲ್ಯಾಲ್ಯಾ ಇಸ್ತಾಸಾ ಸಾಟಿ ಯಕಾ ಮನಾನಿ ಮಿಳುನ್ ಲಡತ್ಯಾಲಿ ಭಾಲ್ಯಾಸಾ ಮನ್ಶುನ್ ಮಿ ಸಮಜುನ್ ಗೆನ್ಹಾರ್.

28 ತುಮ್ಚಾ ವಿರೊದಿನಾ ಬಿಹು ನಕೊಸಾ ಕಾ ಮಂಜೆ ತುಮಿ ಆಸಿ ರಾಹ್ಯಾಚೆ ವಾದಿಂಚಾ ನಾಸಾಲಾಬಿ, ತುಮ್ಚೆ ರಕ್ಷೆನೆಲಾಬಿ ಯೆಕ್ ವಳಕ್ ಜಾಲೆ. ಹ್ಯದೆವ್ ಕರ್ತೊ.

29 ಕಾ ಮಂಜೆ ಕ್ರಿಸ್ತಾವ ಇಸ್ವಾಸ್ ಥೆವಾಚಾ ತ್ಯವ್ಡಸ್ ನವ್ಲೆ ತ್ಯಾಚಿ ಸಾಟಿ ದುಖ್ ಗಿಹ್ಯಾಚೆ ತುಮಾನಾ ಯೊಕ್ ಬರಾ ಅವಕಾಸ್ ಗಾವಲ್ಯಾ.

30 ಆಸ ತುಮಿ ಮಾಜಿಪ ಬಗ್‌ಲ್ಯಾಲ ಆನಿ ಆತಾ ಮಾಜೆ ಗುಶ್ಟಿತ್ ಐಕ್‌ತ್ಯಾಲಾ ತ್ಯೊಸ್ ತರಾಸ್ ತುಮಾನಾಬಿ ಹಾ.

2

ಕ್ರಿಸ್ತಾಚಿ ದೀನತೆ ಆನಿ ಗಿಹ್ಯಾವ್ಣಯಿ

1 ಕ್ರಿಸ್ತಾಚ್ಚಿ ಉಮೇದ್, ಮಾಯೆಚೆ ಸಮಜಾವ್ನ್ ಪವಿತ್ರಾತ್ಮಾಚಿ ಯಕಿ, ಕನಿಕರಾ, ಗಾವ್ಣಾಚಿ ಭಾಲ್ಯಾವ

2 ತುಮಿ ಸಗ್ಳಿ ಯಕಾ ಮನಾನಿ, ಯಕ ಮಾಯೆನಿ, ಯಕ ಬಾವ್ಣಾನಿ ಆಸ್‌ಲ್ಯಾಲಿ ರಾಹುನ್ ಆನಿ ಯೆಕುಸ್ ಮುಞರಾ ಥಿವುನ್ ಮಾಜಿ ಹಾವುಸ್ ಪುರಾ ಕರಾ.

3 ಆನಿ ಇರೊದಾನಿ ನಾಹಿತ ಫಕಲ್ಯಾಫನಾನಿ ಕಾಯೀಕ್ ಕರಾಚೆ ಆಂದಿ ಪರತೇಕ್ ಯೊಕ್ ನ್ಹಾನ್ ವ್ಹಪುನ್ ಆನಿ ಯಕಾಲಾ ಆಪ್ಲಿವ್ಣಿ ಮೊಟಾ ಮನ್ಶುನಿ.

4 ತುಮ್ಚಾತ್‌ಲ್ಯಾ ಪರತೇಕ್ ಯಕಾನಿ ಸ್ವತಾ ಆಪ್ಲಿ ತ್ಯವ್ಡಿಸ್ ನವ್ಲೆ ಆಂದಿ ದುಸರ್‌ಲ್ಯಾಂಚಿಬಿ ಚಿಂತಾ ಕರುನಿ.

5 ಕ್ರಿಸ್ತ ಯೇಸುಪ ಆಸ್‌ಲ್ಯಾಲ ಮನ್ ತುಮ್ಚಿಪಬಿ ರಾಹುನಿ.

6 ತ್ಯೊ ದೇವಾಸಾರಾ ಆಸ್ಲಾತರಿ ದೇವಾಚೆ ಸರೊಸರ್ ರಾನ್ಹಾರಿ ಮುಟಿ ಪದ್ವಿ ಸುಡಿತ್ಪಾಹಿ ಮನ್ಹುನ್ ಯವಜಾಚೆ ಆಂದಿ,

7 ಆಪ್ಲ್ಯಾಲಾ ರಿಕ್ಯಾಮಾ ಕರುನ್ ಸೇವಕಾಚ್ ರುಪ್ ಗಿಹುನ್ ಮಾನ್ಸಾಚೆಗತ್ ಜಾಲ್ಲ್ಯಾ ಮಾನ್ಸಾಚಾ ಆವ್ತಾರಾತ್ ದಿಸ್ಲಾ.

8 ತ್ಯನಿ ಆಪ್ಲ್ಯಾಲಾ ಖಾಲ್ ಕರುನ್ ಮರಾನ್ ಮಂಜೆ ಶಿಲುಬೆಚ್ ಮರಾನ್ ಗಿಹಿಸಾರ ವಿಧೆಯ್ ಜಾಲ್ಲ್ಯಾ.

9 ಹ್ಯಾ ಕಾರ್ನಾನಿ ದೇವಾನಿ ತ್ಯಲಾ ಸಗ್ಳಾತ್ ಮೊಟ್ಯಾ ಜಾಗ್ಯಾವ ಚಡುವುನ್, ಸಗ್ಳಾ ನಾವಾವ್ನಿ ಚಾಂಗ್ಲೆ ಜಾಲ್ಯಾಲ ನಾವ್ ತ್ಯಲಾ ದಿಲ.

10 ಮನ್ಹುನ್ ಸ್ವರ್ಗಾತ್ ದರ್ಫಿವ ಆನಿ ಪಾತಾಳಾತ್ ಆಸ್ಲ್ಯಾಲಿ ಸಗ್ಳಿ ಯೇಸುಚಾ ನಾವಾನಿ ನಡ್ಗ ಗಾಲ್ವಾರ್ ,

11 ಬಾ ಜಾಲ್ಯಾಲ್ಯಾ ದೇವಾಚೆ ಮೈಮೆ ಸಾಟಿ ಪರತೇಕ್ ಯೊಕ ಆಪಲ್ಯಾ ತೊಂಡಾನಿ ಯೇಸು ಕ್ರಿಸ್ತುಸ್ ಪ್ರಭು ಮನ್ಹುನ್ ಕಬುಲ್ ವ್ಹನಾರ್.

ಚಾನ್ಯಾಂಚೆಗತ್ ಚಕ್ರಕಾಚ್

12 ಆಸ ಆಸ್ಲಾನಾ ಮಾಜೆ ಮಾಯೆಚಾನು, ತುಮಿ ಮಾಜಾ ಸಾಂಗ್ನ್ಯಾ ಸಾರಿ ಚಾಲ್ಯಾಸಾ ತಸಿಸ್ ಆತಾಬಿ ಚಾಲಾ. ಮಿ ತುಮ್ಚಿಪ ಆಸ್ಲಾನಾ ತ್ಯವ್ಹಸ್ ನವ್ಲ ಮಿ ನಸ್ಥಾನಾಬಿ ಖುಬ್ ಮನಾಚಾ ಭ್ಯಾನಿ ವಾಡತ್ ತುಮ್ಚಿ ತುಮ್ಚಿ ರಕ್ತೆನ್ ಸಾದುನ್ ಗೆವ್ಲಾ.

13 ಕಾ ಮಂಜೆ ದೇವಾನಿಸ್ ಆಪ್ಲ್ಯಾ ಮನಾಚೆಗತ್ ಕರಾಯಾ ವ್ಹಯಿ ಮನ್ಹುನ್ ತುಮ್ಚಿಪ ಉದ್ದೆಶ್ ಆನಿ ಯತ್ನ ಕೆಲ್ಯಾಲಾ ಜಾಲ್ಯಾ.

14 ಟುರ್ಟುರಾಚೆ ಆಂದಿ ವಾದ್ ವಿವಾದ್ ನಸ್ಥಾನಾ ಸಗ್ಳೆ ಕರಾ.

15 ಆನಿ ತುಮಿ ಭುಕ್ ಕೆಲ್ಯಾ ನಸ್ಲ್ಯಾಲಿ ಆನಿ ಖರ ಮನ್ ಆಸ್ಲ್ಯಾಲಿ ವ್ಹಪುನ್ ವಾಕ್ಡಿ ಬುದ್ ಆಸ್ಲ್ಯಾಲಿ ಮುರ್ಖ ಜಾತಿಚೆ ಮದ್ದಿ ಕಳಂಕ್ ನಸ್ಲ್ಯಾಲಿ ದೇವಾಚಿ ಪೊರ ವ್ಹನಾರ್.

16 ಹ್ಯಂಚಾತ್ ತುಮಿ ಸಗ್ಳಾ ನಾ ಜೀವಾಚಾ ವಾಕ್ಯಾ ದ್ಯಾವ್‌ತ್ಯಾಲಿ ವ್ಹಪುನ್, ದುನೆತ್ ಚಮಕತ್ಯಾಲ್ಯಾ ಚಾನ್ಯಾಂಚೆಗತ್ ದಿಸ್ತಾಸಾ. ತುಮಿ ಆಸಿ

ಚಾಲ್ತಾಸಾತ ಮಿ ಬರೆ ಖಬರಿಸಾಟಿ ಪಳಾಲ್ಯಾಲೊ ಉಗಸ್ ನವ್ವ ಮಿ ತರಾಸ್ ಖಾಲ್ಯಾಲಾ ಉಗಸ್ ನವ್ವ ಮನ್ಯಾಚ್ ವವ್ಯಾಳ್ ಕ್ರಿಸ್ತಾಚಾ ದಿಸಾತ್ ಮನಾ ಗಾವ್ತಾರ್.

17 ತುಮಚಾ ಇಸ್ವಾಸ್ ಮಂಥ್ಯಾಲಾ ಯಜ್ಞ ದೇವಾಲಾ ದಿತ್ಯಾಲೆ ಸೆವೆತ್ ಮಿಸ್ ಪಾನದ್ರವ್ಯ ವ್ಹವುನ್ ಅರ್ಪನ್ ವ್ಹಯಾವ್ಹಯಿ ಜಾಲ್ತಾರಿ ಮನಾ ಸಂತೊಶ್ ಹಾ, ತುಮ್ಚೆ ಸಗ್ಳಾಂಚೆ ಸಂಗ ಸಂತೊಶ್ ವ್ಹತ್ಲೊ.

18 ತಸಿಸ್ ತುಮಿಬಿ ಸಂತೊಶ್ ವ್ಹವಾ, ಮಾಜಿ ಸಂಗಬಿ ಸಂತೊಶ್ ವ್ಹವಾ.

ತಿಮೊಥಿ ಆನಿ ಎಪಫ್ರೋದೀತ್

19 ಫನ್ ಮಿ ತಿಮೊಥೆಲಾ ಬಿಗಿನಿ ತುಮ್ಮಿಪ ಲಾವುನ್ ದಿಯಾ ವ್ಹಯಿ ಮನ್ವುನ್ ಪ್ರಭು ಜಾಲ್ಯಾಲ್ಯಾ ಯೇಸುಪ ಆಶಾ ಕರ್ತೊ. ತ್ಯಚಿಸ್ ಲಾಗುನುಸ್ ತುಮ್ಮಾ ಖನ್ನತಿ ಸಮಜುನ್ ಮಿಬಿ ಉಮೇದ್ ಗೆನ್ನಾರ್.

20 ತ್ಯಂಚಿಗತ್ ತುಮ್ಚೆ ಚಾಂಗ್ಲೆ ಗುಶ್ಟಿತ್ ಉಗಡಲ್ಯಾಲ್ಯಾ ಮನಾನಿ ಯವಸ್‌ತ್ಯಾಚೆಗತ್ ಮಾಜೆ ಸಂಗ ಆನಿ ಕೊನ್ ನಾಹಿ.

21 ಬಾಕಿಚಿ ಸಗ್ಳಿ ಸ್ವತಾಚಾ ಕಾಮಾವಸ್ ಮನ್ ಧೆವ್‌ತ್ಯಾತ ಖರ ಯೇಸು ಕ್ರಿಸ್ತಾಚಾ ಕಾಮಾವ ಮನ್ ಧಿವಿತ್ನಾಹಿತ.

22 ಫನ್ ತಿಮೊಥೆ ಕ್ಯವ್ಡಾ ಚಾಂಗ್ಲಾ ಮನ್ವುನ್ ತುಮಾನಾ ರಾವಾ ಹಾ. ಲ್ಯೊಕ್ ಬಾಲಾ ಕಸಾ ತಸಾಸ್ ತ್ಯನಿ ಮಾಜಿ ಸಂಗ ಬರಿ ಖಬರ್ ಸಾಂಗಾಯಾ ಸಾಟಿ ಸೇವಾ ಕೆಲೆ ಮನ್ವುನ್ ತುಮಾನಾ ರಾವ ಹಾ.

23 ಮನ್ವುನ್ ಮಾಜೆ ಗುಶ್ಟಿತ್ ಕಸ ವ್ಹಯಾಚ್ ತ್ಯ ಸಮಾಜಲ್ಯಾ ಬರ್ಬರ್ ತ್ಯಲಾ ಲಾವುನ್ ದಿಯಾ ಮನ್ ಕರ್ತೊ.

24 ಯವ್ವಸ್ ನವ್ವ ಮಿ ಸಾಹಿತ್ ಬಿಗಿನಿ ಯನಾರ್ ಮನ್ವುನ್ ಪ್ರಭುವ ಘಟ್ ಇಸ್ವಾಸ್ ಹಾ.

25 ಮಾಜಿ ಗರಾಜ್ ಕಡಾಯಾ ತುಮಿ ಲಾವುನ್ ದಿಲ್ಯಾಲಾ, ಮಾಜಾ ಬಾಹು, ಸಂಗಚಾ ಸೇವಕ್ ಜಾಲ್ಯಾಲಾ ಎಪೊಪ್ರೋದೀತಲಾ ತುಮ್ಮಿಪ ಲಾವುನ್ ದಿಯಾಚ್ ಅವಶ ಹಾ.

26 ತ್ಯನಿ ತುಮ್ಚೆ ಸಗ್ಳಾಂಚೆ ಗುಶ್ಟಿತ್ ಆಶಾ ಆನಿ ಆಪ್ನು ಬರಾ ನಸಲ್ಯಾಲಿ ಬಾತ್ನಿ ತುಮಿ ಐಕ್ಲಿಸಾ ಮನ್ವುನ್ ತ್ಯಲಾ ಹುರ್ವುರಾ ಲಾಗುನ್ ಚಿಂತನಿ ರಕ್ಲಾ.

27 ತ್ಯೊ ರೊಗ್ಡಾ ವ್ಹಪುನ್ ಮರಾಯಾ ರಕ್ಲಾ ವ್ಹತ್ತಾ ತ್ಯ ಖರಸ್, ಫನ್ ದೇವಾನಿ ತ್ಯಚಿವ ದಯಾ ದ್ಯಾವ್ಲಿ, ತ್ಯಲಾ ತ್ಯವ್ಡ್ ನವ್ವ ಮನಾ ದುಖಾವ ದುಖ್ ಯವು ನಾಹಿ ಮನ್ವುನ್ ಮಾಜಿವ ದಯಾ ದ್ಯಾವ್ಲಿ.

28 ಮನ್ವುನ್ ತುಮಿ ತ್ಯಲಾ ಪರತ್ ಬಗುನ್ ಸಂತೊಶ್ ವ್ಹಯಾವ್ಹಯಿಸಾ ಮನ್ವುನ್ ಮಾಜಿ ದುಖ್ ಕಮ್ಮಿವ್ಹಯಾ ವ್ಹಯಿ ಮನ್ವುನ್ ಮಿ ತ್ಯಲಾ ಖುಬ್ ಆಶಾನಿ ಲಾವುನ್ ದಿಲ್ಯಾ.

29 ತಸ ಆಸ್ಥಾನಾ ತುಮಿ ತ್ಯಲಾ ಪುರ್ಯಾ ಮನಾನಿ ಸಂತೊಶಾನಿ ಪ್ರಭುಚಾ ನಾವಾನಿ ಮಿಳ್ವುನ್ ಗೆವ್ವಾ ಆನಿ ತಸಲ್ಯಾನಾ ಮರಯ್ ದೇವಾ.

30 ಆಸ ಆಸ್ಥಾನಾ ತುಮಿಸ್ ಮನಾ ಕರಾಯಾ ವ್ಹಯಿ ಮಂಥ್ಯಾಲ್ಯಾ ಉಪ್ಕಾರಾಚೆ ಗುಶ್ಟಿತ್ ಕಮ್ಮಿ ಜಾಲ್ಯಾಲ ಪುರ ಕರಾಯಾ ತ್ಯೊ ಆತ್ಮಾಲ್ಯಾ ಜೀವಾಚೆ ಆಶೆಲಾ ದ್ಯಾನ್ ದಿಯಾಚೆ ಆಂದಿ ಕ್ರಿಸ್ತಾಚಾ ಕಾಮಾಸಾಟೆ ಮೆಲ್ಯಾಚೆಗತ್ ಜಾಲ್ಲ್ಯಾ.

3

ಖರಿ ನಿಯೆತ್

1 ಸರ್ತ್ ಪಾವ್ಟಿ, ಮಾಜಾ ಬನ್ಹಿ ಬಾವ್ತಾನು, ಪ್ರಭುಪ ಸಂತೊಶಾನಿ ರಾವ್ತಾ ಆಂದಿ ಸಾಂಗ್‌ಲ್ಯಾಲ್ಯಾ ತ್ಯಾ ಗುಶ್ಟಿ ಪರ್ತುನ್ ತುಮಾನಾ ಲಿವಾಯಾ ಕಂಟಾಳಾ ಕರಿತ್ನಾಹಿ, ಫನ್ ತ್ಯ ತುಮಾನಾ ಭಪುನ್ ಥೆವ್ನಾರ್.

2 ತ್ಯ ಬುರ್ಸ ಕಾಮ್ ಕರ್ತಾಲ್ಯಾ ಕುತ್‌ರಯಾಂಚಿಪ್ಪಿ ಹುಶಾರ್ ರಾವ್ತಾ ಮುಂಜಿ ಮನ್ವುನ್ ಸಾಂಗುನ್ ಶರೀರ್ ಬಲಿ ದೆತ್ಯಾಲ್ಯಾಂಪ್ಪಿ ಹುಶಾರ್ ರಾವ್ತಾ.

3 ಖರಯಾನಿ ಮುಂಜಿ ಕೆಲ್ಯಾಲ ಕೊನ್ ಮಂಜೆ, ದೆವಾಚಾ ಆತ್ಮ್ಯಾನಿ ಬರಯ್ವುನ್ ವವ್ಯಾಳ್ವಾರ ಯೆಸು ಕ್ರಿಸ್ತಾಪ ಸಂತೊಶ್ ವ್ಹತ್ಯಾತ ಆನಿ

ಶರೀರಾಲಾ ಜುಡುನ್ ಆಸ್‌ಲ್ಯಾಲ್ಯಾವ ಆಶಾ ಥೆವ್ವಾರ ಇಸ್ವಾಸ್ ನಸ್ಸಾರ್ ಜಾಲ್ಯಾಲ ಆಮಿಸ್.

4 ಮಿ ತರಿ ಶರೀರಾಲಾ ಸಮ್ಯನ್ ಆಸ್‌ಲ್ಯಾಲ್ಯಾವ ಇಸ್ವಾಸ್ ಥೆವಾಯಾ ಆವ್ಕಾಸ್ ಹಾ. ದುಸರ್ಯಾನಿ ಕುನಿತರಿ ಶರೀರಾಲಾ ಸಮನ್‌ಆಸ್‌ಲ್ಯಾಲ್ಯಾವ ಆಶಾ ಥೆವಾಯಾ ವ್ಹಯಿ ಮನ್ವುನ್ ಯವಜಾಚೆ ಜಾಲ್ಯಾವ ತ್ಯಚಿವ್ನಿ ಆಗಾವ್ ತಸ ಯವಜಾಯಾ ವ್ಹಯಿಲ್.

5 ಜಲಾಮ್‌ಲ್ಯಾಲ್ಯಾ ಆಟ್ವಿ ದಿಸಿ ಮಾಜಿ ಮುಂಜಿ ಜಾಲಿ, ಮಿ ಇಸ್ರಾಯೆಲ್ ಲೊಕಾತ್ಲಾ, ಬೆನ್ಯಾಮಿನ್ ವಂಶಾತ್ಲಾ, ಇಬ್ರಿಯಾಂಚಿಪ್ಪಿ ಜಲಾಮ್‌ಲ್ಯಾಲಾ ಇಬ್ರಿಯ, ದರ್ಮಶಾಸ್ತ್ರಾರಾಚೆಗತ್ ಬಗ್‌ಲ್ಯಾವ ಮಿ ಪರಿಸಾಯ್.

6 ಫನ್ ಧರ್ಮಾನಿ ಬಗಾಯಾ ವ್ಹಯಿತ ಮಿ ಕ್ರಿಸ್ತ ಮಂಡಳಿಲಾ ತರಾಸ್ ದಿಲ್ಯಾಲಾ, ದರ್ಮಶಾಸ್ತ್ರಾರಾತ್ ಸಾಂಗ್‌ಲ್ಯಾಲಿ ನೀಯತ್ ಬಗ್‌ಲ್ಯಾವ ಮಿ ದೊಸ್ ನಸ್ಸಾರಾ.

7 ತರಿಬಿ ಮಾಜಿ ಫ್ಯಾಯ್‌ದ್ಯಾಚೆ ಸಗ್ಳೆ ಕ್ರಿಸ್ತಾಸಾಟಿ ಲುಕ್ಷಾನಿಚೆ ಮನ್ವುನ್ ಸಮ್‌ಜುನ್ ಗೆತ್ಲೆ.

8 ಯವ್ಹಸ್ ನವ್ವ ಮಾಜಾ ಪ್ರಭು ಜಾಲ್ಯಾಲ್ಯಾ ಕ್ರಿಸ್ತ ಯೆಸುಲಾ ಸಮ್‌ಜುನ್ ಗಿಹ್ಯಾಚೆಕ್ ಖುಬ್ ಬರ ಮನ್ವುನ್ ಬಾಕಿಚೆ ಸಗ್ಳೆ ಲುಕ್ಷಾನಿಚೆ ಮಂತ್ರೊ. ಮನಾ ಕ್ರಿಸ್ತಾಚಾ ಫ್ಯಾಯ್ದಾ ವ್ಹಯಾ ಪ್ಯಾಯ್ದಾ ಜಾಲ್ಯಾಲ ಬಾಕಿ ಸಗ್ಳೆಲ್ಯಾಲಾ ಕೊರ್ ಮಂತ್ರೊ.

9 ಹ್ಯಾತ್ ಮಾಜಿ ಮನ್ವ ಕ್ಯಾ ಮಂಜೆ, ಮಿ ಕ್ರಿಸ್ತಾಲಾ ಕಮವುನ್, ದರ್ಮಶಾಸ್ತ್ರಾರಾಚೆ ಫಳ್ ಜಾಲ್ಯಾಲೆ ಸ್ವತಾಚೆ ನೀಯತಿಲಾ ನವ್ವ ಕ್ರಿಸ್ತಾವ ಇಸ್ವಾಸ್ ಥೆವಲ್ಯಾಲ್ಯಾಸ್ ಲಾಗುನ್ ಗಾವತ್ಯಾಲ ಮಂಜೆ ಕ್ರಿಸ್ತಾವಲ್ಯಾ ಇಸ್ವಾಸಾಚಾ ಆದಾರಾನಿ ದೆವ್ ದೆತ್ಯಾಲಿ ನಿಯೆತ್ ಗಿಹುನ್ ಕ್ರಿಸ್ತಾಪ ರಾಥ್ಯಾಲಾ ವ್ಹಯಾ ವ್ಹಯಿ.

10 ತ್ಯಲಾ ಆನಿ ತ್ಯಚಾ ಪುನರುತ್ತಾನಾತ್ ಆಸ್‌ಲ್ಯಾಲ್ಯಾ ಬಳಾಲಾ, ತ್ಯಚಾ ತರಾಸಾತ್ ವಾಟಿದಾರ್ ಜಾಲ್ಯಾಲೆ ಪದ್ವಿಲಾ ಸಮ್‌ಜುನ್ ತ್ಯಚಾ ಮರ್ನಾಚೆ ಗುಸ್ವಿತ್ ತ್ಯಚಿಗತ್ ವ್ಹಯಾವ್ಹಯಿ ಮನ್ವುನ್ ಮಾಜಿ ಮನ್.

11 ಆಸ ಜಾಲ್ಯಾವ ಮೆಲ್ಯಾಲ್ಯಾತ್ ಧೊಡ್ಯಾನಾ ವ್ಹತ್ಯಾಲ್ಯಾ ಪುನರುಥಾನಾಚಾ ಅನ್ವವ್ ಮನಾಬಿ ವ್ಹಯಿಲ್.

ಬಕ್ಸಿಸಾಸಾಟಿ ಪಳಾಚೆ

12 ಯವ್‌ಡ್ಯಾತ್ ಮಿ ಹ್ಯ ಸಗ್ಳಿ ಗಿಹುನ್ ಪುರ್ನ ಜಾಲ್ಯೊ ಮನ್ವುನ್ ಸಾಂಗಿತ್ಲಾಹಿ. ಫನ್ ಮಿ ಕಚೆ ಗಿಹ್ಯಾಸಾಟಿ ಕ್ರಿಸ್ತ ಯೆಸುನಿ ಮನಾ ದರ್ಲ್ಯಾ ತ್ಯ ಗಿಹ್ಯಾಸಾಟಿ ತ್ಯಚೆ ಮಾಗ ಲಾಗ್‌ಲ್ಯೊ.

13 ಬನ್ನಿ ಬಾವ್ತಾನ್ ಮನಾ ಗಾವಲ್ಯಾ ಮನ್ವುನ್ ಮಿ ಆಜುನ್ ಸಮಜುನ್ ಗೆತ್ಲನಾಹಿ. ಫನ್ ಯಾಕ್, ಮಿ ಮಾಗ್‌ಲ್ಯಾ ಗುಸ್ಪಿ ಇಸ್ರುನ್ ಮೊರಲ್ಯಾ ದರಾಯಾ ಶಾತಿ ಫುಗುವುನ್,

14 ದೆವಾನಿ ಕ್ರಿಸ್ತಾಸ್ಲಾಗುನ್ ಆಮಾನಾ ಮೊಟ್ಯಾ ಫನಾಲಾ ಹಾಕ್ವುನ್ ಆಮಾನಾ ಥೆವ್‌ಲ್ಯಾಲ್ಯಾ ಬಕ್ಸಿಸಾವ್ಲಾ ಮುಜ್ರಾ ಪೊಚಾಯಾಸಾಟಿ ಪಳೆತ್ಲೊ.

15 ಆಮಿಪ ತಯಾರ್ ಆಸ್‌ಲ್ಯಾಲಿ ಸಗ್ಳಿ ಹೆ ಗುಸ್ಪಿತ್ ಹ್ಯಾಸ್ ಇಚಾರಾತ್ ರಾವ್ತಾ ಆನಿ ಕಚೆತರಿ ಯಕ ಗುಸ್ಪಿತ್ ದಿಸ್ರಾ ಇಚಾರ್ ಕೆಲಾಸಾತ ತ್ಯೊ ದೆವ್ ತುಮಾನಾ ದಾವುನ್ ದೆನಾರ್.

16 ಆಮಿತರಿ, ಕಚಾ ನೇಮಾನಿ ಇತ್ಪರ್ಯಾತ್ ಆಲ್ಯಾವ್ ತ್ಯಾ ನೆಮಾಚೆಗತುಸ್ ಚಾಲುಯಾ.

17 ಬನ್ನಿ ಬಾವ್ತಾನ್, ತುಮಿ ಸಗ್ಳಿ ಮಾಜಿ ಸಂಗ ಮಿಳುನ್ ಮಾಜಿಗತ್ ಚಾಲತ್ಯಾಲಿ ವ್ಹವಾ ಆನಿ ಆಮಿ ಸಾಂಗ್‌ಲ್ಯಾಲ್ಯಾ ನೆಮಾಶಾರ್ಕಿ ಚಾಲತ್ಯಾಲ್ಯಾಂಚಿವ ಧ್ಯಾನ್ ರಾಹುನಿ.

18 ಕಾಮಂಜೆ ಖುಬ್ ಜಾನ್ ಕ್ರಿಸ್ತಾಚೆ ಶಿಲಬೆಚೆ ವಾದಿ ವ್ಹಪುನ್ ಚಾಲತ್ಯಾತ. ತ್ಯಂಚೆ ಗುಸ್ಪಿತ್ ತುಮಾನಾ ಖುಬ್ ಖೆಪಾ ಸಾಂಗ್‌ಲ್ಯಾ ಮನ್ವುನ್ ಆತಾಬಿ ರಡುನ್ ಸಾಂಗ್ತೊ.

19 ಶೆವಟ್ ತ್ಯಂಚಾ ನಾಸುಸ್, ಪ್ವಾಟ್ ತ್ಯಂಚಾ ದೆವ್, ಲಾಙ್ಚಾ ಕಾಮಾತ್ಸಿಸ್ ತ್ಯನಾ ಮರ್ಯಾದ್, ತಿ ದುನೆತ್‌ಲ್ಯಾ ಗುಸ್ಪಿಂಚಾ ಇಚಾರ್ ಕರತ್ಯಾತ.

20 ಆಮಿತರಿ ಸ್ವರಗಾತ್ರಿ ಪ್ರಜಾ, ಪ್ರಭು ಜಾಲ್ಯಾಲಾ ಯೇಸು ಕ್ರಿಸ್ತ ತಿತ್ತಿನ್ ರ್ಯಾಕ್ಕಾರಾ ವ್ವಪುನ್ ಯಯಾಚಿ ವಾಟ್ ಬಗ್‌ತ್ಯಾಲ ಹಾವ್.

21 ತ್ಯೊ ಸಗ್ಳೆ ಆಪ್‌ಲ್ಯಾ ತಾಬ್ಯಾತ್ ಗಿಹ್ಯಾ ಬಳ್ ಗಿಹುನ್ ನೀಚ್ ಸ್ಥಿತಿತ್ ಆಸ್‌ಲ್ಯಾಲ ಆಮ್ಚಿ ಶರಿರ್ ಉಜಿಡಾಚಾ ಆಪ್‌ಲ್ಯಾ ಶರೀರಾಚೆಗತ್ ಕರ್ನಾರ್.

4

ಸುಸ್ನಾ

1 ಆಸ ಆಸ್ತಾನಾ ಮಾಜೆ ಮಾಯೆಚಾ ಬನ್ವಿ ಬಾವ್ತಾನು ಮನಾ ಸಂತೊಶ್ ಆನಿ ಕಿರಿಟ್ ಜಾಲ್ಯಾಲ್ಯಾನು, ಮಿ ಸಾಂಗ್‌ಲ್ಯಾ ಶಾರ್ಕ್ ಪ್ರಭುಪ ಘಟ್ ಉಬಿ ರಾವ್ತಾ;

2 ಪ್ರಭುಪ ಯಕಾ ಮನಾನಿ ರಾವ್ತಾ ಮನ್ವುನ್ ಯುವೊದಿಪ ಆನಿ ಸಂತುಕಿಪ ಮಾಗ್ತೊ.

3 ಮಾಜಾ ಖರ್ಮ್ಯಾ ಸಂಗಚಾ ಸೆವಕಾ, ತ್ಯಾ ಬಾಯಿಲ್ಯಾನ್ಸಾನಾ ಮಜ್ಜತ್ ಕರ್ನಾರಾ ವ್ವಪುನ್ ರಾಹ್ಯಾವ್ವಯಿಸ್ ಮನ್ವುನ್ ತುಲಾ ಸಾಂಗ್ತೊ. ತ್ಯಾ ಕ್ಲೇಮೆನ್ಸ್ ದಿಸಿ ಮಾಜೆ ಸಂಗಚಾ ಕಾಮ್ಯಾರ್ಯಾನಾ ಮಾಜಿಸಂಗ ಬರೆ ಖಬರಿಸಾಟಿ ತರಾಸ್ ಖಾಲ್ಯಾಲ್ಯಾನಾ ಮಜ್ಜತ್ ಕರ್. ತ್ಯಂಚಿ ನಾವ ಶಾಸ್ವತ್ ಜಿವಾಚಾ ಪುಸ್ತಕಾತ್ ಲಿವ್‌ಲ್ಯಾತ.

4 ಕವಾಬಿ ಪ್ರಭುಪ ಆನಂದಾನಿ ರಾವ್ತಾ ಆನಂದಾನಿ ರಾವ್ತಾ ಮನ್ವುನ್ ಪುನ್ಸಾಂಗ್ತೊ.

5 ತುಮಚ್ ಥಂಡ್ಲೆನ್ ಸಗ್ಳ್ಯಾ ಲೊಕಾನಾ ಸಮಜ್ಞುನಿ, ಪ್ರಭುಚ್ ಯನ ಜ್ಞವಳ್ ಹಾ.

6 ಕಶಾಚಿ ಚಿಂತಾ ಕರಾಚೆ ಆಂದಿ ಸರ್ವ್ಯಾ ಗುಶ್ಟಿತ್ಲಿ ದೇವಾಚೆ ಮೊರ್ದ್ ಕ್ರತಜ್ಞತಾ ಸ್ತುತಿ ಮಾಗ್ನಿ ಇನಂತಿ ಕರಿತ್ ತುಮಾನಾ ವ್ವಯಿತ್ಯ ಪ್ರಭುಲಾ ಸಾಂಗಾ.

7 ತವಾ ಸಗ್ಳೆ ಸಮಜ್ಞುಕಿವ್ಪಿ ಆಗಾವ್ ಆಸ್‌ಲ್ಯಾಲಿ ದೇವಾಚಿ ಶಾಂತಿ ತುಮ್ಮಿ ಮನ, ಯವಜ್ಞಾ ಕ್ರಿಸ್ತ ಯೆಸುಪ ರಾಮುನಿ.

8 ಸರ್ತ್ಯಾಯಳಾಲಾ, ಭನ್ನಿ ಬಾವ್ವಾನು, ಕಚ್ಚ ಖರ, ಕಿಮ್ಮಿಚ್ಚ, ನೀಯತಿಚ್ಚ, ನಿರ್ಮಳ್, ಮಾಯೆಚ್ಚ, ಮರೆದಿಚ್ಚ ಹಾ, ಕಚ್ಚ ಚಾಂಗಲ್ಯಾ ಗುನಾಚ್ಚ ಹಾ, ಕಚ್ಚ ಮರೇದಿಲಾ ಚಾಂಗ್ಲ ಹಾ, ತ್ಯಾ ಸಗ್ಳಾಂಚಿ ಕ್ಯಾಳ್ಜಿ ಕರಾ.

9 ತುಮಿ ಮಾಜಿಪ್ಪಿ ಕ್ಯಾ ಶಿಕ್‌ಲ್ಯಾಸಾ, ಆನಿ ಮಾಜ್ಜ ಕ್ಯಾ ಐಕುನ್ ಬಗ್‌ಲ್ಯಾಸಾ ತ್ಯಸ್ ಕರಿತ್ ಯವಾ. ಆಸ ಕೆಲ್ಯಾವ ಥಂಟ್ವನಾಚಾ ದೆವ್ ತುಮ್ಮಿ ಸಂಗ ರಾನ್ದಾರ್.

ಬಹುಮಾನಾಸಾಟಿ ದನ್ಯವಾದ್

10 ಮಾಜಿವ ತುಮಾನಾ ಆಸ್‌ಲ್ಯಾಲಿ ಕ್ಯಾಳ್ಜಿ ಇತ್‌ಕ್ಯಾ ದಿಸಾನಂತರ್ ಆನಿಕ್ ಫುಟ್ಲಿ ಮನ್ವುನ್ ಮಿ ಪ್ರಭುಪ ಖುಬ್ ಸಂತೊಸ್ ವ್ಹತೊ. ಆಸ್ಲಿ ಯವಜ್ಜಾ ತುಮ್ಮಿಪ ಆಂದಿದರ್ದಿ ಆಸ್‌ಲ್ಯಾವ, ಮಜ್ಜತ್ ಕರಾಯಾ ಶಾರ್ಕಾ ಯೊಳ್ ಮಿಳುನ್ ಆಲಾನವ್ಚಾ.

11 ಮನಾ ವ್ಹಯಿ ಜಾಲ್ಯಾಲೆ ಗುಶ್ಟಿತ್ ಹ್ಯ ಮೀ ಸಾಂಗಿತ್ವಾಹಿ ಮೀ ಹಾ ತ್ಯಾತುಸ್ ಸಮಾದಾನಾನಿ ರಾಹ್ಯಾ ಸಿಕ್‌ಲ್ಯೊ.

12 ಗರಿಬ್ತಿತ್ ರಾಹ್ಯಾಚ್, ಸಗ್ಳ ಆಸ್ತಾನಾ ಕಸ ರಾಹ್ಯಾಚ್ ಮನಾ ರಾವ ಹಾ. ಮಿ ತ್ರಪ್ತ, ಬುಕಚ್ಚಾ, ಸಗ್ಳ ಆಸ್ತಾರಾ, ಕಾಯ್ತಾಸ್ತಾರಾ, ಜಾಲೊತರಿ ಕಸ್ಲೆ ಪರಸ್ತಿತ್ ಆಸ್ಲೊತರಿ ತ್ಯಚಿ ಪಾರಕ್ ಮನಾ ಹಾ.

13 ಮನಾ ಬಳ್ ದೆತ್ಯಾಲ್ಯಾ ಕ್ರಿಸ್ತಾಸ್ ಲಾಗುನ್ ಮಿ ಸಗ್ಳ ಕರಾಯಾ ಬಳಿಜಾಲ್ಯೊ.

14 ಆಸ ಆಸ್ತಾನಾ ತುಮಿ ಮಾಜಾ ತರಾಸಾತ್ ವಾಟಿದಾರ್ ಜಾಲ್ಯಾಲ ಬರಜಾಲ್ಲ್ಯಾ.

15 ಫಿಲಿಪಿತಲ್ಯಾನು, ಆಂದಿ ತುಮ್ಮಿಪ ಬರಿ ಖಬರ್ ಸಾಂಗುನ್, ಮಕೆದೊನ್ಯಾತ್ನಿ ನಿಗುನ್ ಜಾತಾನಾ ದೆನ್ಯಾ ಗೆನ್ಯಾಚೆ ಗುಸ್ಪಿತ್ ತುಮ್ಮೆ ಶಿವಾರ್ ದಿಸ್ಲೆ ಕಚೆಸ್ ಮಂಡಳಿನಿ ಮನಾ ಮಜ್ಜತ್ ಕಿಲಿನಾಹಿ ಮನ್ವುನ್ ತುಮಾನಾ ರಾವ ಹಾ.

16 ಮಿ ಥೆಸಲೊನಿಕಾತ್ ಆಸ್ತಾನಾಬಿ ತುಮಿ ಯಂಗ್ಲಾ ದೊಂದಾ ಮಾಜಿ ಗರಜ್ ಬಾಗಿವ್ಲೆಸಾ.

17 ಮಿ ತುಮ್ಮಿಪ್ಪಿ ದಿನ್ನಿಚಿ ಆಶಾ ಕರಿತ್ನಾಹಿ ಫನ್ ತುಮ್‌ಚಾ ಇಸೊಬ್ ವಾಡ್ವಾಚಾ ಇಚ್ಚಾಹಾ.

18 ಮನಾ ವ್ಹಯಿತ್ಯ ಹಾ, ಸಗ್ಳ ಆಸ್ತಾರಾ ಹಾ. ತುಮಿ ಎಪೊವೊದಿಪಾಪ ಲಾವುನ್ ದಿಲ್ಯಾಲ ಮಾಜಿಪ ಪೊಚ್‌ಲ್ಯಾ ತ್ಯನಿ ಮಿ ಬರ್‌ವ್ಹುನ್ ಉತ್ತು ಆಲ್ಯೊ ತ್ಯ ದೆವಾಲಾ ದಿಲ್ಯಾಲ ವಾಸಾಚಿ ಯಜ್ಞ ಹ್ಯಸ್ ದೇವಾಲಾ ಮಾನ್ಯ ಜಾಲ್ಯಾ.

19 ಮಾಜಾ ದೆವಾನಿ ಕ್ರಿಸ್ತ ಯೆಸುಪ್ಪಿ ಆಪ್‌ಲ್ಯಾ ಉಜಿಡಾಚೆ ಸಾವ್ವರಿಚೆಗತ್ ತುಮ್ಮಿ ಗರಜ್ ಬಾಗಿವ್ನಾರ್.

20 ಆಮ್ಚಾ ಬಾ ದೆವಾಲಾ ಖಾಯಿಮ್ ಮೈಮೆ ವ್ಹವುನಿ. ತಸಸ್ ವ್ಹವುನಿ.

ಸರ್ತ ಸಲಾಮ್

21 ಕ್ರಿಸ್ತ ಯೆಸುಪಲ್ಯಾ ಸಗ್ಳಾ ದೇವಾಚಾ ಲೊಕಾನಾ ಮಾಜಿ ದನ್ಯಾವಾದ್ ಸಾಂಗಾ. ಮಾಜೆ ಸಂಗಚಿ ಬನ್ವಿ ಬಾಹು ತುಮಾನಾ ನಮಸ್ಕಾರ್ ಸಾಂಗ್‌ತ್ಯಾತ.

22 ಹಿತ್ತ ಆಸ್‌ಲ್ಯಾಲ್ಯಾ ಸಗ್ಳಾ ದೇವಾಚಾ ಲೊಕಾಂಚಾನಿ ತುಮಾನಾ ನಮಸ್ಕಾರ್ ಸಾಂಗಲ್ಯಾ ಲ ಕರುನ್ ಕೈಸರ್ ರಾಜಾಚಾ ಗರಾಷ್ಟಿ ತುಮಾನಾ ನಮಸ್ಕಾರ್ ಸಾಂಗ್‌ತ್ಯಾತ.

23 ಪ್ರಭು ಯೆಸು ಕ್ರಿಸ್ತಾಚಿ ಕ್ರಪಾ ತುಮ್ಮಾ ಆತ್ಮಾಸಂಗ ರಾಹುನಿ.

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922